

Gui'ch yaloj ni guxhaal San Pabl loj ree b́en Corinto rlliladx Jesucrist

Rxhiaal Pab xtiidx Dios

1 Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, b́en rlliladx Jesucrist. ²Caxhalan gui'ch guie par lějt najdi b́en rlliladx xtiidx Dios luguiedx Corinto, lějt guial ma nayadi delant loj Dios por Jesucrist, abi' ma bacaabee Dios lějt gaquidi xbejnman bacaabee tēeman gra ree b́en gra lad b́en rlliladx ree Jesucrist, b́en naj Dad par dunuj ree nē par laa reeman. ³Dux Dad ree Dios nē Dad Jesucrist gūinle' lějt, yabe'cdxe tēē reeman luxdoodi.

Rudēd Pab quixtēē loj Dios

⁴Gra dxejczy rudēdan quixtēē loj Dios por lějt zi'c ma gognēman lějt guial rlliladxidi Jesucrist. ⁵Nē guial najdi tijbzi con Jesucrist dád ma gognē Dios lějt, baneeman lějt quiarguejn din guinieedi chignia' tēedi xtiidxaman. ⁶Zian rguien guial diidxli naj ni ma biguiejndi por Cristo diizd chi guzuloj bililadxidi laaman. ⁷Abi' zianczi rajpidi xyudar Dios la'tgaj rbēzidi dxej ni gui't Jesucrist zatijb. ⁸Abi' Dios gagnē lějt din sudxi'chidi

guidiblagaa loj ni rlliladxidi laaman, chitēē xhie xtolidi chu' dxej ni gui't dux Dad ree Jesucrist zatijb. ⁹Din Dios diidxli rŷjn xtiidxaman cumplid, abi' laaman naj b́en gule lějt din gaquidi tijbzi con dux Dad ree Jesucrist.

Ad rayalt la' lasa' ree xbejn Jesucrist

¹⁰Compniar raliduladx ree Jesucrist, rniaaban lojdi por Jesucrist din guidxag cwedi, ad gaquidi tio'p lala', tijbzi gol gojc, tijbzi xgab gol been. ¹¹Rnin lojdi zian compniar raliduladx ree Jesucrist, din ma gogbeen guial yu' wadijl entr lějt, zian bagojn ree xfamil Cloé naj. ¹²Guial garent garen rēb ree bejn, yu' reeman rēb: “Naj naj xbejn Pab”, yu' tēē reeman rēb: “Naj naj xbejn Apolos”, yu' reeman rēb: “Naj naj xbejn Bēd”, yu' tēē reeman rēb: “Naj naj xbejn Cristo.” ¹³Per naj rni lojdi guial Cristo tijbzi najman, din ad najt gŷt loj crŷz por lějt, ad guobnijs tēētidi par gaquidi da bejnan. ¹⁴Quixtēē Dios chi wan ladxidi achut mazri barobnijsan, Crispozi nē Gayo. ¹⁵Chitēē guiēbidi guial guobnijsidi par gaquidi da bejnan.

¹⁶Barobnijs tēen xfamil Estéfanas, per ad rusaaladxtran chu mazri barobnijsan. ¹⁷Din ad guxhaalt Cristo naj par gurobnijsan bejn ree, guxhaalaman naj par gatie'chan diidx xhienaag gap bejn perdon loj Dios. Ad cane tēetan con diidx ni yadxaløj ree bejn naj luar cu'guijc reeman par xhie güjt Cristo loj crüjz.

**Xguialrniabee Dios nē
xquiargueijnman**

¹⁸Gra ni raguie'ch ree guial por xhie güjt Cristo loj crüjz, achet lasajcan par ree bèn zē loj nejz mal. Per par dunuj ree guial ma raya'p ree perdon, dád lasajc xguialgüjtaman din zian rayagbee ree xhienaag naj xguialrniabee Dios.

¹⁹Abi' loj xtiidx Dios rēb:

Gunijtan xquiargueijn ree bèn ni rēb guial rajc da't reeman, abi' guscayyan xquiargueijn ree bèn ni rēb guial rignia' da't reeman.

²⁰Yan, ¿con ree bèn rēb guial rajc da't reeman? ¿Con ree mextr rajc ley? ¿Con ree bèn rēb guial rajc da't reeman xcwent ree ni yu' loj guidxliuj? Par Dios achet lasajc xquiargueijn bénguidxliuj. ²¹Abi' por xquiargueijn Dios ragbeechaawaman guial ad zayünbeet bénguidxliuj laaman por xquiargueijn reeman, zeel beenman xgab yabēēman bejn loj casti por xtiidxaman ni caylüün bejn ree. Abi' ree bèn yarii loj casti guin laa reeman naj bèn rliiladx laaman, majsi par ree ben ren achet lasajc ni canin por Cristo.

²²Din bèn Israel ree rēn reeman guguiaa reeman milagr dín

chililadx reeman, abi' ree bèn ad najt bèn Israel rēn reeman guien reeman ni mazri nawēēg dín chililadx reeman. ²³Per dunujn ni caylüün bejn ree naj par xhie güjt Cristo loj crüjz, abi' ree bèn Israel rdx'e'ch reeman, guiáad par ree bèn ad najt bèn Israel achet sirv rüjn ni caylüün. ²⁴Per par ree bèn ma bacaabee Dios, zi'c ree bèn Israel zi'c ree bèn ad najt bèn Israel, por Cristo rguien xguialrniabee Dios nē xquiargueijnman. ²⁵Din ni rulüü achet lasajc guial ni rüjn Dios, laan naj ni mazri lasajc loj xguialrajc bénguidxliuj. Abi' xt ni bigra xguialrniabee Dios laan naj ni mazri lasajc loj xguialrniabee bénguidxliuj. ²⁶Gol gogbee compniar raliduladx ree Jesucrist guial ta'nzi ree bèn rliiladx laaman naj bèn rignia' zi'c naladx ree bénguidxliuj, ta'nzi ree bèn rliiladx laaman rajp guialrniabee loj guidxliuj guie, abi' ta'nzi ree bèn rliiladx laaman naj ree bèn za loj ree famil ni naj bèn zøjbloj. ²⁷Abi' Dios gulej ree bèn ni naladx ree bejn ad rajcza'ct dín yaya'nxtu ree bèn rajc da't, gulej tēēman bèn ad ca't ree guialrniabee dín yaya'nxtu ree bèn ca' guialrniabee. ²⁸Dios gule ree bèn ni naladx ree bejn guial achet sirv laa reeman, bèn ni naladx ree bejn guial achet lasajc reeman, bèn ni achut naj loj guidxliuj guie dín chiquiedaman xguialdxal ree bèn naj ree chunin loj guidxliuj guie. ²⁹Zianan zeel achut zajc güün benro' delant loj Dios. ³⁰Yan por Dios ma najdi tijbzi con Jesucrist, dxel por laaman rtia'di xguialrajc Dios. Abi' guial raliduladx ree

Jesucrist ad zayaltri ree casti, por laaman ma naya ree, nayajc tēē ree par laaman abi' ma raya'p ree perdon loj Dios. ³¹Zianan din gac zi'c rēb loj xtiidx Dios lod rēb: “Bal yu' bén rēn guilies xvalor gajc, luar güüindi zian gol gules xvalor dux Dad ree Jesucrist.”

Xtiidx Jesucrist bén cwa loj crüjz

2 Compniar raliduladx ree Jesucrist lējt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx nawēēg par chignia'di. ²La'tgaj guzun con lējt ad gunetan diidx ren ree lojdi, tijbzi xcwent Jesucrist bén cwa loj crüjz. ³Abi' chi wan ladxidi zi'c tijb bén ni ad yu't gojl, rniyczan guial rdxeban bialan lojdi. ⁴Nē chi gunenē'n lējt, chi gunen xtiidx Dios lojdi, ad gunenē'tan lējt con ree diidx ni günan lējt gan por da diidxan, benan gan rliladxidi Jesucrist por xyudar xSprijt Dios nē xguialrniabeeman. ⁵Din guiguien guial ni rliladxidi Jesucrist zēēdan por xguialrniabee Dios ad por xguialrajct bēnguidxliuj.

Por xSprijt Dios nünbee bejn laaman

⁶Majsi chi ralüün bén ni ma rajc ree mazri xtiidx Dios, ralüün laa reeman por guialrajc. Per ad por guialrajct ni yu' loj guidxliuj guie, lasa' guialrajc ni rajp ree bén rniabee, guialrajc ni yu' dxej nit. ⁷Ralüün laa reeman por guialrajc ni zēēd por Dios, din yanee ree zi'c naj xixgab Dios, xgab ni goc ni naguie'ch par ree bēnguidxliuj, abi' xgab guin naj guial chililadx

reeman Jesucrist, diizd chi gad guidxliuj gacchaaw been Dios xgab guin din gac yayal ree xanyabaa. ⁸Laan naj tijb ni ad gogbeet ree bén rniabee loj guidxliuj guie, din bal niagbee reeman dxel ad nucaat reeman dux Dad ree Jesucrist loj crüjz, bén ca' gualrniabee. ⁹Per loj xtiidx Dios rēb:

Achut waguiaa, achu tēēt

waguiejn

abi' ni'quid wayüjnt

bēnguidxliuj xgab

por ni nagu'chaaw Dios par ree

bén rēn laaman.

¹⁰Per dunuj ree ma balüü Diosan duloj ree por xSprijtaman bén naban con dunuj ree, din xSprijt Dios gran ragbeeman, xt ni mazri naguie'ch ni zēēd por Dios.

¹¹Achut ragbee xhie xgab cayüjn tijb bejn. Xsprijtsaman ragbee xhie xgab cayüjnman. Ziangajc xSprijt Dios tijbzi laaman ragbee xhienaag naj xixgab Dios. ¹²Abi' dunuj ree guial ma zunaal ree xnejz Dios, ad nabajnt ree con tijb sprijt ni zēēd loj guidxliuj guie, ma nabajn ree con Sprijt zēēd loj Dios, din por xSprijt Dios yayagbee ree gra ni ma bazaladx Dios duloj ree guial najman benza'c. ¹³Abi' laa reen naj ni caylüün bejn ree, per ad por dux quiarguiejntan, xSprijt Dios culüü dunujn xhienaag yanen. Zian ralüün xcwent Dios bén ma nabannē xSprijtaman.

¹⁴Per bén ad nabannēt xSprijt Dios ad rliladxtaman ni zēēd ree por Dios ni rulüü xSprijt Dios dunuj ree, din par laaman najn tijb ni ad rüjnt sirv. Zeel ad zajct chignia'man xcwent Dios din con xSprijtzi Dios

zajc chignia' bejn ni rën guiëban.

¹⁵Per bèn ma nabannè xSprijt Dios por Sprijt guin rignia'man ni naj xcwent Dios, abi' ni'qui tijb ree bèn ad nabannèt xSprijt Dios ad rignia't chexc zeel rignia'man ni guin ree. ¹⁶Loj xtiidx Dios rëb: “¿Chu ma bignia' xixgab Dios? ¿Chu zajc guluü Dios ni güünman?” Per dunuj ree, naj dux xgab ree zi'c xixgab Cristo.

Compniar rüjn ree sirv loj Dios

3 Compniar raliduladx ree Jesucrist, chi guzun con lëjt ad gunenë'tan lëjt zi'c ree bèn ma nabannè xSprijt Dios, gunenë'n lëjt zi'c ree bèn ad nabannèt xSprijt Dios, zi'c ree bèn qui guzulojri rliladx Jesucrist. ²Diidx ad nawëëgt ree gunenë'n lëjt zi'c rudëë bejn lejch loj tijb xindobëz guial xo gawix ni raw bengol, zian gunenë'n lëjt diidx ad nawëëgt ree. Abi' ni'qui yan ad zile't ganenë'n lëjt zi'c ree bèn ma rignia' mazri xtiidx Dios. ³Din sta nabandi zi'c naban gra ree bénguidxliuj. Nadëdloj lasa'di rdil tëëdi, zian rguien guial sta nabandi zi'c gra ree bénguidxliuj bèn ad zinalt ree xnejz Dios. ⁴Din chi rëbidi: “Naj naj xbejn Pab”, o chi rëbidi ya: “Naj naj xbejn Apolos”, zian rguien guial sta cayüjndi zi'cgajc chutëëz bénguidxliuj.

⁵Per naj rni lëjt: ¿Chu naj Pab o chu naj Apolos? Gol gogbee guial nayajczan tio'p ree bèn cayüjn sirv loj Dios persi bile' bililadxidi tijb gajc dunujn cayguieen dxiin ni baneë Dios dunujn. ⁶Yaguie'ch ree guial naj naj zi'c bèn rxübin abi' Apolos naj bèn rguuil, per por Dios

cayagbeedi mazri xtiidxaman zi'c rusni'saman tijb cwaandoo. ⁷Abi' zi'c bèn rxübin zi'c bèn caguuil mandadzi cayüjn reeman, Diosan naj bèn ni rusni's ni rxübin reeman. ⁸Yan ziangajc naj con Apolos tijbzi mandad cayguieenan, rayagbeen guial zunee Dios dunujn ni rayalan bal xhienaag yaguieenan mandad ni baneeman yaguieen tijb gajc dunujn. ⁹Zeel naj con Apolos nayajcan compniar cayguieenan xmandad Dios.

Yaguie'ch ree lëjt naj xguiniaa Dios lod cayguieenan dxiin o lëjt naj zi'c tijb yu ni cayüjn Dios. ¹⁰Abi' naj guial catiechan xtiidxaman najn zi'c tijb albanil bèn ni rajp da't cudad din grii xchiinman zagdxe guial bacaabeeman naj günan xcimiant yu guin. Abi' ree bèn ni cusnuu culüü xtiidx Dios, laa reeman naj zi'c bèn cusnuu cayüjn yu guin. Per rayal gap reeman cudad xhienaag cales reeman yu guin, ¹¹din achut zajc guchaa cimiant ni ma benan, abi' cimiant guin naj guial rliladx Jesucrist. ¹²Abi' ree bèn ni cayguie'ch ree naj ree bèn ni cusnuu cales yu loj cimiant ni cayguie'ch ree naj guialrliladx Jesucrist, bal cayüjn reeman laan con or o con plajt o con ree guiaj zagdxe o con yag o con biqui o con balagya'. ¹³Per chi guidxin dxej ni güün Dios xguialguxtisaman, dxel guiguien xhienaag naj xchiin reeman. Din dxej guin gac zi'c chi rajc prueb xhienin loj guij din guiguien xchiin tijb gajc bejn. ¹⁴Abi' bal rüjn sirv ni beenman zi'c tijb bèn ni ruzoob tijb yu ni ad re'ct, zaca'man ni

rayalaman por ni beenman. ¹⁵Per bal che'c ni beenman, sacaman zi'c tijb b́en ni re'c lidx abi' penz rliaaman loj bajl, din zajcaman perdon per gusëebaman gra.

¹⁶Zeel gol gogbee guial lëjt naj zi'c tijb xyadoo Dios guial nabandi con xSprijt Dios. ¹⁷Abi' bal chu b́en guitie'chdojn b́en rliadx ree Jesucrist, zunidloj Dios laaman guial ruse'nman xyadoo nagle'man ni canin naj lëjt guial najdi xbejnman.

¹⁸Ad gusquiee lëjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli b́enrajc da't.

¹⁹Din delant loj Dios achet lasajc guialrajc b́enguidxliuj, tib lajt loj xtiidxaman rëb: "Ad rudëet Dios mod grii zagdxe ni naj xixgab ree b́en naladx guial dád nasin reeman par güün reeman tijb ni ad najt xnejz." ²⁰Rëb tää loj xtiidxaman: "Dios ragbeechaaw guial xixgab ree b́en rajc da't achet lasajcan." ²¹Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra. ²²Ma nulendi dunujn, naj Pab, Apolos në Bëd. Xieendi naj guidxliuj, guialnaban, guialgüjt, ni yu', në ni qui chu'ri, xieendi naj gra. ²³Abi' lëjt ma najdi xbejn Cristo abi' Cristo naj Xi'n Dios.

**Dxiin ni been ree b́en naj
ree xi apóstoles Jesús**

4 Gol baguiaa dunujn zi'ctzi xmojs Cristo par yasiidan bejn ree xhienaag naj xixgab Dios, xgab ni naguie'ch par bejn. ²Per lëjt ragbee guial tijb mojs naj par

güünman gra ni rayal güünman din gap reeman laaman confianz.

³Zeel ad rutan xgab bal xhienaag ruguiaadi naj o bal xhienaag ruguiaa ree guxtis naj, din ni'qui naj ad zajct ganin xhienaag najn.

⁴Din majsi bal naladxan guial achet ni mal wayünan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaag cayünan. ⁵Zeel ad rayalt yadxa lojdi chu cayüjn zagdxe o chu ad cayüjnt zagdxe, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandadaman guidib du luxdoo ree, dxej guin yayagbee ree xhie diidzza'c guiniee Dios por tijb gaj dunuj ree.

⁶Compniar raliduladx ree Jesucrist, gra ree ni canin lëjt wen par lëjtan. Abi' Apolos con naj nayajcan tijb ejempl par lëjt, din por dunujn gusiididi ad tädlaaj guiliesidi xvalor bejn chitëe por zian gusa'ndi trajs stijb bejn. ⁷Din ni'qui tijb bejn ad lasajct mazri loj stijb bejn. ¿O xhie rajpidi ni ad baneet Dios lojdi? Abi' bal por laaman rajpidi ni rajpidi, ¿chexc zeel rlies xvalorgajquidi zi'c rülüü ad por Diost rajpidi laan?

⁸Lëjt naladxidi achet ryaadxidi, guial ma bayaaloj rignia'di abi' ad ryaadxtridi dunujn. Abi' naladxidi najdi zi'c ree rey. iPer xinix niajquidi rey din nanabeen con lëjt!

⁹Yu' dxej naladxan guial dunujn nayajcan xi apóstoles Jesús, Dios basial dunujn yayajcan zi'c ree b́en ad lasajct, zi'c ree benmal ni rayal guialgüjt, abi' radxaloj ree anjl në

ree b nguidxliuj dunujn. ¹⁰Abi' la'tgaj nayajcan zi'c ree b n ad yu't xquiargueijn par b nguidxliuj guial ratie'chan xtiidxza'c Cristo, l jt rlies xvaloridi guial rignia' da'tidi guial rliladxidi laaman. Dunujn nayajc zi'c b n ad yu't gojl gui ad l jt naladxidi yu' da'tidi gojl abi' rajp ree bejn l jt respejt gui ad dunujn ad r nt reeman dunujn.

¹¹Xt yandxej sta cayzaagdajjn por guialrliaan, guial re'c nijs n  guial ryaadx du xaban. Zienloj ni r jnn  ree bejn dunujn, achet du lidxan.

¹²Abi' d d radxagan raguieenan dxiin din guidxel ni yadaawan. Chi ruzaal ree bejn diidxmal du guijcan radxi'n n con diidxza'c, abi' radaanan ni r jnn tzi reeman dunujn. ¹³Abi' chi rnieeguijdx reeman dunujn, raneeza'cn 'n laa reeman. Xt yan nayajcan zi'c tijb guix par b nguidxliuj, nayajcan zi'c tijb ni ad r jnt sirv par laa reeman. ¹⁴Ad cucatan gui'ch guie par gusa'nxtun l jt, cucan laan din gunen l jt consejw zi'cgajc da xi'n reen guial r nan l jt. ¹⁵Din majsı gapidi zi'c chii mil ree b n gusiid l jt, per najzi naj zi'c tijb Dad par l jt. Din por naj guzuloy rliladxidi Jesucrist chi basidan l jt xtiidxza'caman. ¹⁶Zeel rniaaban lojdi din guibandi zi'c nabanan.

¹⁷Din par zian rxhialan Timoteo guitixlojman l jt, b n r nan zi'c da xi'n n laaman diidxli rliladxaman Jesucrist. Laaman gusaaladx l jt xhienaag nabanan guial rliladxan Jesucrist, din zi'c nabanan naj ni cusidan b n rliladx ree Jesucrist gra lod ran. ¹⁸Yu' ree xcompniaridi naladx guial ad zitixlotran l jt abi'

rlies xvalor reeman guial naban reeman zagdxe. ¹⁹Per Dios gunee permis din diob guitixlon l jt dxel gagbeen wali reeman ya naban reeman zi'c rniee reeman o rnieez reeman. ²⁰Din guial guiban zi'c rniabee Dios ad najtan diidxzi, rayal g  n bejn zi'c rniabee Dios con xguialrniabeeman. ²¹Yan,  conin r ndi g nan chi guitixlon l jt, gadil 'n l jt ya o gui enan l jt ganen 'n l jt diidxza'c?

Xhienaag gac con b n r jn tijb dol

5 Ma bacagdiagan guial tijb l jt b n rliladx ree Jesucrist nabann  xnarojpidi zi'c lacheelidi, ni'quiza ree b n ad n nbeet Dios ad r jnt lasa' dol guin. ²Abi' l jt r jndi benro', luar r jndi benro' gol guyunaya gol bab   t   b n guin lojdi. ³Majsı ad za'tan con l jt, per r nan xgab por l jt zi'cgajc rul   za'n con l jt, abi' ma benchaawan xgab xhie rayal b n r jn dol guin. ⁴Zi'c guialrniabee ni banee Jesucrist naj, naj rni l jt: "Gol bachajg lasa'di." Dxel gol gunaladx guial za'n con l jt abi' por xguialrniabee Dad Jesucrist, ⁵gol been b n guin tiblax, gol basa'nman loj xinxxab din gagnaaman o sagdajman por ni cay jnman din gacaman perdon dxej ni gui't dux Dad ree Jesucrist.

⁶Ad nixtan guial rlies xvalorgajquidi abi' rti jbidi rajc lasa' ree dol guin. Gol gogbee guial zi'c r jn levadur cob par guiadxtil ziangajc con tijb b n g  n dol ma z  gajcan zian con gra ree lasa'di. ⁷Zeel gol been naguieejn din gaquidi naya zi'c cob harin ni ad yu't levadur guijc.

Din zi'c bagüjt ree bejn tijb xiil lanij pascw din yaya xtol reeman, ziangajc dunuj ree por xguialgüjt Jesucrist ma naya ree loj Dios. ⁸Abi' guial yabaa ree por zian naj guial yabajn ree guidib du luxdoo ree zi'c rayal, zi'c guiadxtil ni ad no'cht levadur, luar yabajn ree con ree ni mal në ree dol zi'c babajn ree yaloj.

⁹Abi' zi'c ma rnin lojdi loj stijb gui'ch ni ma guxhalan lojdi, ad guchajguidi bén naban ree nadxuudx.

¹⁰Ad canenë'tan lëjt zian por ree bén ad rliadxt Dios, bén naban ree nadxuudx o rzëëbladx reeman ni ruguiaa'tzi reeman o naj reeman gubaan o rën reeman ni ren luar guiën reeman Dios, din bal zianan dxel ryaadx yariidi loj guidxliuj guie.

¹¹Bén ni canin lëjt naj ree bén ni rëb naj ree xcompniaridi, bén rliadxt ree Jesucrist abi' naban reeman nadxuudx, o rzëëbladx reeman ni ruguiaatzzi reeman, o rën reeman ni ren ree luar guiën reeman Dios, o rbëë reeman xtiidx bejn, o naj reeman bengui', o béngubaan. Xcompniaridi bén naban ree zian ni'quid rayalt gawnëdi laa reeman. ^{12,13}Ad da cwenttan naj ganen por ree bén ni ad najt dux compniar ree loj ni raliiduladxt ree Jesucrist bal rajp reeman dol o ad rajpt reeman dol, Dios naj bén güün guialguxtis con laa reeman, per dux cwent ree naj guial yazuxnejz ree bén naj ree dux compniar ree bén rliadxt ree Jesucrist. Zeel gol babëë bén cayüjn dol entr lojdi.

**Chi yu' wadijl entr ree
bén rliadxt Jesucrist**

6 Zi'c chi xhie rzajcnë tijb xcompniaridi bén rliadxt

Jesucrist, ¿chexc zeel rëjdi loj guxtis din yabëëxnejzaman ni rzajquidi luar chedi loj ree xcompniaridi bén rliadxt ree Jesucrist? ²¿Id rliadxtidi ya guial yu' dxej bén rliadxt ree Jesucrist laa reeman naj bén güün xguialguxtis loj ree bénguidxliuj? Abi' bal yu' dxej güün xguialguxtis reeman loj bénguidxliuj, ¿chexc quiza zeel ni ad nawëëgt ni rzajc ree xcompniaridi ad rajct rabëëxnejzidi? ³¿Id ragbeedi ya guial xt loj ree xianjl Dios yu' dxej yaya'p ree guialrniabee? iAbi' xt mazri zile' yalëëxnejz ree ni cayza'c ree loj guidxliuj guie! ⁴Zeel zi'c chi xhie rzajcnë lasa'di, ¿chexc zeel zëdi loj ree bén ad najt xbejn Cristo din yabëëxnejz reeman ni rzajquidi? ⁵Canin lëjt ni guin ree din yatu lojdi. ¿Wen nid yu'czi tijb lëjt zajc yabëëxnejz ni rzajc lasa'di ya? ⁶Per lëjt luar güündi zian aal rudëëd lasa'di loj ree bén ni ad rliadxt Dios.

⁷Abi' natun guial gudëëd xcompniaridi loj guxtis guial cadilidi, mejorli gol gudaan ni rüjnnë reeman lëjt. Mejrli tiëbidi cuan reeman xieendi. ⁸Per luar güündi zian, lëjtl cayüjn ree ni mal guin con ree xcompniaridi bén rliadxt ree Jesucrist. Rti'a'di xien reeman abi' rüjnnëdi laa reeman ni ad rayalt güünnëdi laa reeman.

⁹¿Id ragbeedi ya guial bén naj ree benmal ad zut reeman loj xguialrniabee Dios? Gol gogbee guial loj xguialrniabee Dios ad zut ree bén ni naban ree nadxuudx, në ree bén rën ree ni ad najt ree Dios, në ree bén za'në bén ad najt lacheel

reeman, nē ree xinguaaw rún zi'c b́engunaa nē ree xin rēn lasa' xinguaaw zi'c b́engunaa. ¹⁰Nē ree b́engubaan, nē ree b́en rzēēbladx ni ruguiaatzí reeman, nē ree bengui con ree b́en rnieeguijdx bejn, nē ree b́en raguiil xhienaag chiquied reeman xieen bejn, ad zut reeman loj xguialrniabee Dios. ¹¹Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb b́en ni ad wayújnt dol por xguialrniabee Dad Jesucrist nē por xSprijt Dios b́en ma nabannēdi.

Dux cuerp ree naj par Dios

¹²Walican zajc yaguieen ree zi'ctzi rayēn ree, per ad gratan naj zagdxe par gúün bejn. Zajc gúnan zi'ctzi rēnan, per ad zatiēēbtan xhie nabee naj. ¹³Yu' ree bejn rēb: “Guialraw naj par lēn bejn, abi' lēn bejn naj par guialraw.” Walican, per gunidloj Dios grop ree ni guin. Per ad walitan guial xcuerp bejn naj par gúünman ni dxuudx ree con b́en ad najt lacheelaman. Din dux cuerp ree naj par Dios, abi' laaman rniabee dux cuerp ree. ¹⁴Dxel zi'c basban Dios dux Dad ree Jesucrist, ziangajc yasbanman dunuj ree por xguialrniabeeman.

¹⁵Gol gogbee guial ma najdi tijbzi con Cristo, guial dux cuerp ree ma naj tibia' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yunē' ree tijb b́engunaa dxuudx? ¡Ad rayalt gac zian! ¹⁶¿Nid ragbeedi ya guial chi runē bejn tijb b́en ni ad najt lacheelaman, dxel ma najman tijbzi con bendxuudx guin? Lējt ragbee

guial loj xtiidx Dios rēb: “Grop reeman ma naj tijbzi.” ¹⁷Per b́en ni ma naj tijbzi con dux Dad ree Jesucrist, najman tijbzi con laaman por xSprijt Dios.

¹⁸Gol gojp da't cudad ad gúündi ni dxuudx ree con b́en ad najt lacheelidi. Xhietēēz dol ren ad ruxhiintan xcuerp bejn zi'c rxin xcuerpaman chi rúnman ni dxuudx con b́en ad najt lacheelaman. ¹⁹Din gol gogbee guial lējt naj xyadoo xSprijt Dios b́en ma baneeman lojdi, dxel zian zi'c ma nabandi con xSprijt Dios ad rniabeetri lējt gajc. ²⁰Din par zian gudijx Jesucrist por dunuj ree chi gütaman loj crújz. Zeel gol beennē xcuerpidi dxiin par gúündi Dios b́en zobjbloj, din laaman naj b́en rniabee lējt.

Consejw xcwent guialruxhliaa

7 Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdxe naj guial ad zuxhliaat bejn. ²Per chitēē gúün bejn dol con stijb bejn, zagdxen guial tijb gaj xinguaaw chu' lacheel o tijb gaj b́engunaa chu' lacheel, ³din gudēē xinguaaw guin gust lacheelix abi' b́engunaa guin gudēēzaman gust lacheelaman. ⁴Din chi ma baxhliaa tijb b́engunaa ad laatraman rniabee xcuerp, xinguaaw guin naj xin rniabee laan. Ziangajc chi ma baxhliaa xinguaaw, ad rniabeetri xcuerpix, b́engunaa guin ma rniabee laan. ⁵Zeel xinguaaw nē b́engunaa ad rayalt gudxoon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cwedx

guiniabidi Dios, zagdxen. Per chi ma gudéd ree dxej guin, gol bachajg lasa'di stijb chitëë güün xindxab lëjt gan con ree xixgabidi.

⁶Ad canitan lojdi guial najczi guxhliaa bejn, per ad ni maltan guial guxhliaa. ⁷Da xgaban naj guial xi nix gra ree bejn gac zi'c naj, per tijb gaj bejn ma bazaladx Dios xquiarguejnman guial xhienaag guibanman, bal guxhliamaan o bal id zuxhliamaan.

⁸Par ree b́en xtijb në par ree béngunaa bizëjb, naj rni guial zagdxeli yaya'n reeman zi'c naj.

⁹Per bal id zadaan reeman guial ad zuxhliat reeman, dxel zagdxeli guxhliaa reeman luar gudëd xcuerp reeman casti guial taan reeman.

¹⁰Guiáad ree b́en ma baxhliaa, ad da diidxtanan ganin lojdi, xtiidx dux Dad ree Jesucristan guial ad zaro'nt béngunaa lacheelaman.

¹¹Per bal tio'n lacheelaman ad rayalt guxhliaanëman xin ren, zagdxeli naj yachajg lasa' reeman stijb. Ziangajc xinguaaaw ad najt yala' lacheelix.

¹²Yan, ni ganin ad ni guneet dux Dad ree Jesucristan, per naj rni lojdi: Bal yu' xinguaaaw riladx Jesucrist abi' lacheelix ad riladxt, abi' bal par béngunaa guin achet güünan, dxel ad najt yala' lasa' reex.

¹³Ziangajc bal riladx béngunaa guin abi' lacheelaman ad riladxt, abi' bal par xinguaaaw guin achet güünan, dxel ziangajc ad rayalt yala' reeman. ¹⁴Din xinguaaaw ni ad riladxt Jesucrist, züjnle' Dios laax guial riladx lacheelix. Guiáad béngunaa ni ad riladxt Jesucrist

züjnle' Dios laaman guial riladx lacheelaman, zian güünle' Dios xi'n reex. Din bal id naj zian, ad nayabt xi'n reex loj Dios zi'c tijb b́en ni ad wayüjnt dol. ¹⁵Per bal xinguaaaw o béngunaa ni ad riladxt Jesucrist rënman yala' lacheelaman guial riladx lacheelaman Jesucrist, yala'ri reeman. B́en riladx ad zajct güünman naguiejn guibannë lacheelaman laaman din ad gurejdx Dios dunuj ree par yabajn ree con wadijl. ¹⁶Din béngunaa guin ad ragbeetaman bal güünman gan chililadx lacheelaman, o bal xinguaaaw guin ma riladx dxel ni'qui laax ad ragbeet bal güünx gan chililadx lacheelix.

¹⁷Naj rni guial tijbgaj ree b́en ni ma riladx Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuloj riladx reeman Jesucrist. Zianan naj ni cayën loj ree dux compniar ree b́en riladx ree Jesucrist güün reeman. ¹⁸Bal tijb bejn chi guzuloj riladxaman Jesucrist mal yu'man sen ni ru ree b́en Israel, yaya'nraman zian. O bal id yu'man sen guin chi guzuloj bililadxaman Jesucrist, ad najt chu'man sen guin. ¹⁹Din achet güünan bal yu' bejn sen guin o ad yu'taman sen guin, ni mazri lasajc naj guial güünman zi'c rniabee Dios. ²⁰Zeel gol baya'n zi'c najdi chi guzuloj bililadxiidi Jesucrist. ²¹Bal najl zi'c b́en nado' chi guzuloj bililadxil laaman, ad najtan ni chu'l xgab xhienaag güünl. Per bal zile' ad zajctril zi'c b́en nado', mazri zagdxé bari loj ni najl zi'c

b́en nado' guin. ²²B́en ni naj zi'c b́en nado' chi guzuloj bililadxaman Cristo ma najman zi'cgajc b́en ni ad najt zi'c b́en nado' par ǵuünman sirv loj Cristo. Abi' b́en ni ad najt zi'c b́en nado' chi guzuloj bililadxaman Cristo, dxel Cristo ma rniabee laaman. ²³Ĺejt ragbee guial ma gudijx Jesucrist zro' por ĺejt, yan ma najdi par Dios. Ad rayalt tiébidi nabee ree b́enguidxliuj ĺejt con ree ni rusquiee. ²⁴Zeel rnin lojdi compniar raliduladx ree Jesucrist, gol baya'n zi'c najdi chi guzuloj bililadxidi Jesucrist.

²⁵Yan ĺejt b́en ad waxhliaat ree, dux Dad ree Jesucrist achet ŕebaman por zian. Per naj zajc gunen ĺejt consejw xhienaag ǵuündi, abi' da xgaban naj guial zaliladxidi ni ganin lojdi din guial raya Dios naj bacaabeeman naj cayünan mandad ni cayünan. ²⁶Zeel naladxan guial zi'c naj tarbajw ni caydüüd ree yan, zagdxeli naj guial ad zuxhliaatidi. ²⁷B́en ni ma baxhliaa ad najt gusa'n lacheelaman. Guiáad b́en ni ad waxhliaat ad rayalt ǵuünman naguiejn guxhliaaman. ²⁸Per bal ŕijnl xgab guxhliaal, ad dolt naj guxhliaal. Ziangajc ree biinxdüb ni ŕen guxhliaa, ad dolt naj guxhliaa reem. Per rugojnan ĺejt guial zienloj naj ni rzajc b́en ruxhliaa, abi' laan ad ŕentan saquidi.

²⁹Ni ŕenan gagbeedi naj guial ma caydop ree dxej ni zio'p ree loj guidxliuj guie par yaguieen ree xmandad Dios. Zeel b́en ni ma baxhliaa ree gol been sirv Dios xt lod guneetzan ĺejt zi'cgajc ree b́en ni ad waxhliaat. ³⁰Ni'qui

guialrabaa, ni'qui guialrunaya, ni'qui guial rajp bejn xhienin loj guidxliuj guie achet zajc gudxoon guial ǵuün bejn xmandad Dios. ³¹B́en ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdéd.

³²Ni ŕenan naj guial ad zutidi xgab por ree ni yu' loj guidxliuj guie. Tijb xinguaaw xtijb mazri ŕijnx xgab por xmandad Dios, mazri ŕijnx naguiejn ǵuünx zi'c ruladx Dios. ³³Per tijb xinguaaw ni ma baxhliaa mazri ŕijnx xgab por ree ni yu' loj guidxliuj guie, par laax mazri ŕijn naguiejn yabaanë lacheelix laax. ³⁴Dxel tio'p ma naj xixgabix, por Cristo në por xb́engunaax. Ziangajc tijb b́engunaa ni ad waxhliaat mazri ŕijnman xgab por ree xmandad Dios guidiblagaa ŕijnman sirv loj Dios par ǵuünman zi'c ruladxaman. Per tijb b́engunaa ni ma baxhliaa mazri ŕijnman xgab por ree ni yu' loj guidxliuj guie, mazri ŕijnman naguiejn yabaanë lacheelaman laaman.

³⁵Gra ni canin lojdi, canin laan par ǵunan ĺejt yudar ad par gudxontan guxhliaadi, caninan din guibandi zi'c rayal xnejz dxel gol been gol gubajn t́eë zi'c ŕen dux Dad ree Jesucrist sin guial gudxoon xhienin ĺejt.

³⁶Chutëëz xinguaaw ŕijn xgab guxhliaanë biin rnieenëx abi' bal ma yu' biingunaa guin ijz par guxhliaam, ǵuünri reex ni naladx reex naj zagdx par laa reex. Bal guxhliaa reex, guxhliaari reex. Ad doltan guial guxhliaa

bejn. ³⁷Ziangajc chutëez bén ni ad rüjnt xgab guxhliaa, ad rayalt güünman xgab guial rüjn naguiejn guxhliaaman bal ma beenman xgab zagdxé guial ad zuxhliaataman. Din zagdxé gajcan bal id zuxhliaa bejn. ³⁸Zeel rnin lojdi zagdxen guial chu guxhliaa, per mazri zagdxé bal id zuxhliaa bejn.

³⁹Tijb béngunaa chi ma baxhliaaman, ad rayalt sunëman xinguaaw ren chi nabannë lacheelaman. Per bal guiët lacheelaman ma zajc tia' xin ren laaman per con tijb ree xcompniaraman xin rliladx Jesucrist. ⁴⁰Per naladxan guial mazri zagdxé guibanman bal id zuxhliaaman stijb. Zian rünan xgab guial nabannë'n xSprijt Dios zi'cgajc lëjt.

Guialraw ni rbe'c ree bejn loj ni naladx reeman naj Dios

8 Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhienaag yaguieen ree por ree ni guin, per yu' dxej por guialrignia' rlies bejn xvalor gajcaman. Per guialrën lasa' bejn lasajc mazri din por guial rën lasa' bejn zile' yaguieen yudar du lasa' ree din yasnuu yayignia' ree xhienaag rayal yabajn ree. ²Bal yu' bén naladx guial ma bayaaloj rignia'man gra, cusquiee laagajcaman din ryaadx da'tri chignia'man. ³Per bén ni rën Dios, Dios nünbee laaman.

⁴Yan por guial raw bejn guialraw ni ma gule'c reeman loj ree ni

naladx reeman naj Dios, dunuj ree rayagbee guial achet guialrniabee rajp ree dios guin loj guidxliuj guie, din tijbzi Dios yu'. ⁵Majsi yu' ree bejn naladx guial yu' zien ree dios bén rniabee xanyabaa në loj guidxliuj, ⁶per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa tëëman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tëë raya'p ree guialnaban.

⁷Per ad grat ree bejn rüjn xgab zian. Din yu' ree bén ni guyën graloj ni naladx reeman naj Dios, abi' yan guial qui bililadxri reeman Jesucrist naladx reeman guial dolan gaw tijb bejn guialraw ni ma gurej loj ree dios guin. ⁸Dunuj ree rayagbee guial ad ni rawt bejn rüjn guiban bejn mazri zagdxé loj Dios, lasa'gajcanaan bal yadaaw ree o ad zadaawt ree lasa' ree guialraw guin. ⁹Per majsi lëjt ragbee guial zajc gawidi xhietëëznin, rayal gapidi cudad ad güüندی guial ree bén qui rliladxri Jesucrist güün reeman dol. ¹⁰Din bal lüj guial achet naladxil rawil xhietëëznin, zobjil cayawil guialraw ni ma gurej loj ree ni ad najt dios. Dxel guguaia tijb ree bén qui rliladxri Jesucrist lüj abi' nëgajcaman sëëbladx gaw guialraw guin majsi lën luxdooman naladxaman guial ad zagdxet naj ni cayünman. ¹¹Dxel por xguialrajquil cayünl guial güünman dol guial ad nixt yu' luxdooman cayawaman ni guin ree, per badxe'guijc guial në por laaman güjt Jesucrist loj crüjz. ¹²Zeel bal rüjnl tijb ni naj ni

mal par ree bèn qui rliiladxri ree Jesucrist abi' rüjn reeman dol por lüj, dolan cayüjn delant loj Cristo. ¹³Bal por tijb ni rawan rüjn ree da compniaran dol, mejorli ad zawtran laan chitëë güünman dol por naj.

Ni zajc güün tijb apóstol

9 Lëjt ragbee guial zajc günan ni rënan por guialrniabee ni ra'pan guial najn apóstol. Ma baguiaan dux Dad ree Jesucrist abi' lëjt naj ree bèn ni ma benan gan par laaman guial ma bililadxidi laaman. ²Bal yu' ree bèn ni ad nünbeet naj zi'c apóstol, per lëjt ragbee guial apóstol najn. Din zi'c ma rliiladxidi Jesucrist dxel ma rguien guial diidxli najn apóstol.

³Abi' par ree bèn ad rliiladxid guial najn apóstol, ze naj ni rën loj reeman: ⁴Ra'pan derejch gunee reeman ni gawan në ni guië'n. ⁵Abi' zajc tëë guxhlian con tijb bëngunaa naj dulasa' raliduladx ree Jesucrist din chinë'n laaman bantëëz guin gan, zi'c rüjn los demazri ree apóstoles con ree bijch Dad Jesucrist në Bëd. ⁶¿O najzi con Bernabé bayal yaguieenan xmandad Dios dux cwentan ya? ⁷Per ni'qui tijb suldad ad rejt loj wadijl xcwentaman, yu'czi bèn rguijx xgaxtaman. Ziangajc bèn rxübin uv, ¿wen id zajc gawaman laan ya? Laadx bèn ni rajp vag ree, ¿wen id zajc guië'man xlejch reeb ya? ⁸Abi' ad xixgabtzi bënguidxliujn canin lojdi, në loj ley ni badëë Dios loj Moisejs rëb zian. ⁹Din loj ley guin rëb: “Ad gudxe'di guijxh ro' ree be gui'xh la'tgaj cayüjn reeb dxiin.” Ad rëbt Dios

zian guialzi yu'man laa reeb xgab, ¹⁰rëbaman zian por dunuj ree. Din zi'c bèn rlia' yuj zi'c bèn rusia trigo, grop reeman yu'guijc guial yu' ni yaca' reeman. ¹¹Yan ma balün lëjt xhienaag chinalidi xnejz Dios, ¿wen zro' da't yanaaban lojdi ya bal güüнди dunujn yudar din gusnuu dux guialnabanan? ¹²Bal stijb ree bèn ni rusiid lëjt rila' rtia' reeman ni rayal gudëëdidi loj reeman, dxel ziangajc dunujn raya'pan mazri derejch güüнди dunujn yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitëë xhie cwib guijc guial ad zucaagdiajgtri ree bejn xtiidxza'c Jesucrist. ¹³Lëjt ragbee guial gra ree bixhioz ni rüjn sirv lën xyadoo Dios, rtia' reeman tibda'n ni rinë ree bèn Israel loj Dios persi rila' rbajn reeman. Ziangajc gra ree bixhioz ni rüjn ree sirv lule' yadoo guin lod rinë ree bejn be ree par Dios, në reeman rtia' ta'n ni rinë ree bejn persi rila' rbajn reeman. ¹⁴Yan laagajcan rëb dux Dad ree Jesucrist por ree bèn ni ruliü xtiidxza'caman, guial por ree bèn ni ruliü reeman rayal guiban reeman. ¹⁵Per naj achet caca'n, ad caxhal tëëtan gui'ch guie lojdi din guneedi xhienin. Din par naj zagdxeli naj guiëtan luar chu' bèn chiquied guialrabaa guin luxdon guial cusidan bejn ree xtiidxza'c Jesucrist.

¹⁶Ad rayalt gales da valor gajcan guial cusidan bejn ree xtiidxza'c Jesucrist, din mandad guin naj ni bayalan. iProb naj bal idan gusid bejn ree diidxza'c guin! ¹⁷Zeel

bal cayünan mandad guin guial ruladxan günan laan, dxel yu' ni gaca'n. Per ni'qui bal id ruladxan günan mandad guin, laan bayal günan. ¹⁸Abi' ni rünan gan naj guialrabaa ni yu' luxdon majsi ad naxtan, majsi ad caca'tan ni rayal tia' b́en ni rulüü xtiidxza'c Jesucrist, per cusnuu culün diidxza'c guin ree bejn ree.

¹⁹Abi' majsi ad yu't b́en rniabee naj por mandad guin, per laa naj guie par gra ree bejn din gac günan sirv xbejn Cristo. ²⁰Abi' chi za'n con ree b́en Israel, rünan naguiejn persi yu'guijc reeman guial nayajcan b́en Israel din günan gan gac reeman xbejn Cristo. Chi za'n con ree b́en Israel b́en rüjn ree naguiejn chinal xley Moisejs dxel rünan zi'c b́en zinal ley guin, din günan gan gac reeman xbejn Cristo, majsi ragbeen guial ad rniabeet ley guin naj. ²¹Abi' chi za'n con ree b́en ad najt b́en Israel, b́en ad zinalt ree ley guin dxel majsi ragbeen guial Dios naj b́en rniabee naj guial nabanán zi'c rniabee Cristo, per rünan naguiejn din guguaa reeman naj zi'cgajc tijb lasa' reeman din gac günan gan gac reeman xbejn Cristo. ²²Chi za'n con ree b́en yu'nawëëg par güün reeman o gaw reeman xhienin, dxel rünan naguiejn din su reeman zagdxe con naj dín günan laa reeman yudar gac reeman xbejn Cristo. Bantëëz lod ran rünan naguiejn din guguaa reeman naj zi'cgajc tijb lasa' reeman, din günczan gan majsi ta'nzi reeman günan gan gap reeman perdon por Cristo.

²³Gra ree ni guie cayünan guial rënan xtiidxza'c Jesucrist, din

tiblojzi güünle' Dios naj con gra ree b́en rliadx diidxza'c guin ree.

²⁴Lëjt ragbee guial chi yu' tijb carrer zien bejn ruxüün, per tijbzaman naj b́en rtia' prem. Ziangajc lëjt gol been naguiejn tia'di ni gunee Dios. ²⁵B́en ni ruxüün ree rajp laagajc reeman cudad chitëë xhie gudxoon guxüün reeman. Rüjn reeman zian din güün reeman gan, abi' ni rüjn reeman gan naj tijbzi coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit. ²⁶Abi' ragbeechaawan xhienin cayünan, ad cayüntan zi'c tijb b́en ni ruxüün sin guial gagbeen chexc, ad rüntan zi'c tijb b́en ni rga'p sin guial gagbeeman ban ca'paman. ²⁷Zeel cusagdiaj naj gajc din gac ganabee naj gajc günan zi'c rayal günan, chitëë guial culün bejn ree xtiidxza'c Jesucrist achet yayalan delant loj Dios.

Guial rën ni ad najt ree Dios

10 Compniar raliduladx ree Jesucrist, gol basaaladx guial dux bengol gulal ree b́en binal ree Moisejs, gra reeman guza xan zaj ni guxhaal Dios abi' gra reeman gudëd loj nijsdoo ni la nijsdoo xnía. ²Zian biguien guial xbejn Moisejs naj reeman din gra reeman gusanë laaman xan zaj guin, abi' gudëd reeman con laaman loj nijsdoo guin. Zian gurobnijs reeman loj zaj guin në loj nijsdoo guin. ³Gra tëë reeman gudaw guialraw ni bi't diid xanyabaa. ⁴Gra tëë reeman gu' nijs ni bazaladx Dios loj reeman, nijs

brii lad tijb gui'aj. Rën guiëban guial diizd nadxel mal naban Cristo con laa reeman lod zëtzi reeman.

⁵Per zien reeman ad beent zi'c ruladx Dios, abi' güjt reeman niz loj yujbidx niz lod guza reeman.

⁶Gra nine gojc din yayagbee ree guial ad laat yaguieen ree lasa' ree ni mal ni been reeman. ⁷Ad rayalt yayën ree ni rëb ree bejn naj ree Dios zi'c been zien ree dux bengol gulal ree, din rëb loj xtiidx Dios xcwent reeman: “Gurej reeman, gudaw reeman dxel bisu reeman been reeman ni dxuudx ree.” ⁸Ad rayal tëët güün bejn ni dxuudx con bén ad najt lacheelaman, zi'c been zien ree dux bengol gulal ree abi' tijb dxex güjt gajlbichoon mil reeman. ⁹Ad zaneeguijdx tëët ree Dios zi'c been zien ree bén guin, abi' gudaw bëël laa reeman persi güjt reeman. ¹⁰Ad rayal tëët yaguie'ch ree guial ad cayüjnt Dios zi'c rayal, din zian been zien ree dux bengol gulal ree abi' guxhaal Dios tijb anjl bagüjt laa reeman.

¹¹Gra ni guzac reeman cwan loj xtiidx Dios din yayagbee ree guial ad laat yaguieen ree zi'c been reeman, dunuj ree guial nabajn ree yan guial ma caydop dxex ni yadëd ree bejn cwent loj Dios. ¹²Zeel bén ni naladx za'dxi'ch loj xnejz Dios, mejorli gapaman cudad chitëë güün dol laaman gan. ¹³Gra ni cazajquidi ad najtan ni ad rzajct bejn, din Dios ad zaro'nladxtaman lëjt. Ad zuslaat Dios saquidi tijb ni ad zadaantidi, abi' laaman güün lëjt yudar din gagbeedi xhienaag laadi loj ni cayajc.

¹⁴Zeel compniar raliduladx ree Jesucrist, zi'c rënan lëjt rnin lojdi

gapidi cudad ad goc guiëndi ni naladx ree bejn naj dios. ¹⁵Naj ragbee guial najdi ganax bén rignia', zeel lëjt gajc gol been xgab bal zagdxex naj ni canin lojdi. ¹⁶Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radül' ree vin ni ma gogle' rasaaduladx ree rejn ni ma guxie'man chi gütaman por dux tol ree. Abi' chi radaaw ree guiadxtil zi'c beenman, laan naj tijb sen guial ma nayajc ree tijbzi con laaman. ¹⁷Din majsi zien nayajc ree, per zi'c rlia' tijbzi guiadxtil par dugra ree, zian rguien guial ma nayajc ree tijbzi con Cristo.

¹⁸Lëjt ragbee xhienaag rüjn ree bén Israel chi rinë reeman tijb gon par Dios, abi' zi'c raw reeman tiblia' gon guin yu'guijc reeman guial ma naj reeman tijbzi con Dios. ¹⁹Ad canitan lojdi por ree ni naladx ree bejn naj dios guial lasajc reen o guial lasajc guialraw ni gurej loj ree dios guin. ²⁰Din bén rüjn ree zian ad lojt Diosan rbe'c reeman guialraw guin ree, loj xinxaban rbe'c reeman laa reen. Abi' ad rëntan gaquidi tijbzi con ree xinxab guin. ²¹Ad zacjt güündi zian par guiguien guial ma najdi tijbzi con ree xinxab guin, abi' gaw tëedi guiadxtil con vin din guiguien guial ma najdi tijbzi con Cristo. ²²¿O rëndi ya yache'ch ree Dios? ¿Wen mazri raya'p ree guialrniabee guial lojman ya?

Xhie zajc güün ree xbejn Dios

²³Graczi zajc güün bejn, per ad gratan naj zagdxex guial güünman. Majsi gra zile' güün bejn, per ad gratan rüjn sirv par güün lasa'man

yudar chinalaman xnejz Dios. ²⁴Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

²⁵Zi'c chi rziidi b́eel luguia', ad guiniabdiidxidi bal ma gurejn loj xdios reeman, chit́eé xhie guinaladxidi chi gawidi laan.

²⁶Din xieen dux Dad ree Dios naj guidxliuj con gra ni yu' lojn.

²⁷Bal tijb b́en ad waliladxt xtiidx Dios na lojdi guial chitawidi lidxaman, abi' bal ŕendi chedi gol chej. Gol gudaw gra ni guneé reeman lojdi ad xhie guiniabdiidxidi chit́eé xhie naladxidi. ²⁸Per bal yu' xcompniaridi na guial ni cunee b́en guin cayawidi ma gurejn loj xdiosaman, ad gawidi laan por b́en bagojn ĺejt chit́eé ǵuünman xgab mal guial ad laat cayüjndi, majsi ĺejt ragbee guial xieen dux Dad ree Dios naj guidxliuj ńe ni yu' loj guidxliuj guin. ²⁹Ad canitan ĺejt xcwent guial xhie naladxidi, ni canin ĺejt naj por ree xgab ni zajc ǵuün stijb xcompniaridi por ĺejt.

Per wed yu'di ŕijn xgab: “Per, ¿chexc zeel ad züntan gra ni ragbeen ad najt ni mal por xixgabzi stijb bejn? ³⁰Wed ŕeb t́eédi: Naj ragbee guial rud́en quixt́eé loj Dios por gra ni rawan, ¿chexcquiza zeel ǵuün reeman xgab mal por naj?” ³¹Per naj rni lojdi gra ree ni guin rayal gudxe'guijquidi din zi'c ni rawidi zi'c ni ŕe'di ńe gra ree ni ŕijn di rayal ǵuündi laan par ǵuündi Dios b́en zojbloj. ³²Gol gojp cudad xhienaag nabandi din zi'c ree b́en Israel zi'c ree b́en ni ad najt b́en Israel con ree xcompniaridi

b́en riladx ree Jesucrist ad züjnt reeman xgab mal por ĺejt. ³³Din zian ŕunan, ŕunan naguiejn chit́eé xhie naladx bejn con naj. Ad ŕuntan ni ŕijnzi naj yudar, ŕunan naguiejn din ǵunan ni ŕijn yudar zien ree bejn din gac gap reeman perdon loj Dios.

11 Zeel gol binal zi'c ŕunan, zi'c zinaalan zi'c been Cristo.

Xhie rayal ǵuün ree bejn chi rbejdx rniab reeman Dios

²Naj dád rabaan'́en ĺejt guial rusaaladxidi naj, guial yu'guijquidi ŕijn t́eédi zi'c balün ĺejt. ³Ŕen t́eén gusaaladxidi guial Dios rniabee Cristo abi' Cristo rniabee xinguaaaw abi' xinguaaaw rniabee b́engunaa. ⁴Tijb xinguaaaw chi rgu' xhienin guijqux par cwedx guiniabix Dios o gulüüx xtiidx Dios, natu naj ni cayüjnx. ⁵Ziangajc chut́eéz b́engunaa cabejdx canab Dios o culüüman bejn ree xtiidx Dios, abi' achet xoob guiycaman, natu gajc naj ni ŕijnman. Ǵuünman cwent guial najman zi'c tijb b́engunaa ni bij guiyc xt garej. ⁶Zeel bal tijb b́engunaa ad ŕentaman guixhioob xhienin guiycaman, gugajli guiycaman. Per bal ragbeeman, guial natun guiyaj guiycaman xt garej, mejorli guixhioob xhienin guiycaman. ⁷Per xinguaaaw achet zajc chu' guijqux din Dios beenman laax zi'cgajczí laaman, zian rulüüx respejt ni rajpix Dios. Abi' b́engunaa guial rxhioob xhienin guiycaman, zian rulüüman respejt ni rajpaman xinguaaaw. ⁸Din ad gojct xinguaaaw con guxtil

lad búngunaa, búngunaa guin gojc con guxtil lad xinguaaaw. ⁹Ad gojct xinguaaaw par búngunaa, búngunaa guin gojc par xinguaaaw. ¹⁰Zeel búngunaa rayal guixhioob xhienin guijcaman din guiguien guial xinguaaaw rniabee laaman zi'c ruliüü ree anjl chu rniabee laa reeman. ¹¹Majsi delant loj Dios tiblojzi naj bejn, din bal id búngunaa niu achut xinguaaaw niu, abi' bal id chu xinguaaaw niu achut búngunaa niu. ¹²Walican, guial con guxtil lad xinguaaaw gojc búngunaa, per yan por búngunaa ri't xinguaaaw loj guidxliuj, zeel zi'c xinguaaaw con búngunaa por Dios yu' reeman loj guidxliuj.

¹³Naj rni lëjt, lëjt gajc gol been xgab bal zagdxen cwedx guiniab tijb búngunaa Dios abi' achet naxhoob guijcaman. ¹⁴Bejn gajc ragbee guial natun bal id zugaj guijc xinguaaaw. ¹⁵Per par búngunaa mazri zagdxe rguienman bal guyool guidxguijcaman, din rajpaman laan par gusiaawan guijcaman. ¹⁶Bal chu ad za't conform por ni canin lojdi, per naj rugojn lëjt guial achet stijb costumbr raya'p ree, zian naj dux costumbr ree con los demazri ree bèn rililadx xtiidx Dios.

Ruxhiin reeman zi'c basa'n Dad Jesucrist gac

¹⁷Yan xcwent ni ma ganin lëjt, ad zile't ganin guial zagdxe naj ni cayüjndi din chi radxaag lasa'di par cwedx guiniabidi Dios, al ni ad rayalt güüнди rüjndi. ¹⁸Yaløj rnin lojdi biguiejnan guial chi radxaag lasa'di par cwedx guiniabidi Dios

ad raya'ntidi diidx, abi' tiblاد rililadxanan. ¹⁹Din nawëëg najn guial ad zajct zian, abi' zian rguien chu diidxli zinal xnejz Dios. ²⁰Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist. ²¹Din tijbgajdi rüjn naguiejn diob gawidi, ad rbëjzt xcompniaridi. Abi' la'tgaj yu' ree bejn rliaan, yu'di raw da't abi' xt rzüdxidi guial rë'di zi'ctzi rëndi. ²²¿Id yu' lidxidi ya lod gawidi guië' tëëdi zi'ctzi rëndi?, ¿o ad rëntidi xcompniaridi bèn rililadx ree xtiidx Dios ya, zeel rusa'nxtudi bènprob ree bèn achet rajp? Yan, ¿rëndi ya chu' luxdon zagdxe con lëjt por zian? iPer zian zi'c cayüjndi, ad zajct ganin lojdi guial zagdxe naj ni cayüjndi!

Ni bigra gudaw Jesucrist xche

(Mt. 26:26-29; Mr. 14:22-25; Lc. 22:14-20)

²³Abi' ni balün lëjt, basidan laan por dux Dad ree Jesucrist guial guxhin ni bayü reeman laaman chi bigra gudawaman xche, cwa'man tijb guiadxtil. ²⁴Abi' chi gulox badëëman quixtëë loj Dios dxel gula'man guiadxtil guin, rëb gajman: “Guiadxtil guie naj da cuerpan ni ma bayün par guiëtan por lëjt. Abi' chi güüнди zian, gol beenan guial gusaaladxidi naj.” ²⁵Ziangajc beennëman cojp ni yu' vin chi gulox gudaw reeman xche, dxel rëbaman: “Vin guie naj da rejnan ni gaxhie'n chi guiëtan par gaxhalan tijb nejz cüb guial xhienaag gac ree bejn perdon loj Dios. Abi' chi güüнди zian, gol been zian guial rusaaladxidi naj.” ²⁶Zeel, beegaj chi radxaag lasa'di

par gawidi xche zi'c been dux Dad ree Jesucrist, chi rawidi guiadxtil re' t́eedi vin, zian rulüüdi guial güjtaman por lęjt, gol been zian xt chi gui'taman loj guidxliuj guie zatijb.

Xhienaag rayal gac xche

²⁷Yan bal yu' b́en raw guiadxtil re' t́eeman vin xche guin, abi' ad yu' guijctaman ni ŕen guięb ni cayüjnman, dolan cayüjnman guial ad yu'guijctaman ni ŕen guięb xcuerp nę xrejn dux Dad ree Jesucrist. ²⁸Zeel rayal güün bejn xgab xhienaag nabanman delant loj Dios dxel ma zajc gawaman guiadxtil guię' t́eeman vin xche guin. ²⁹Din b́en raw guiadxtil guin con vin guin abi' ad yu'guijctaman ni ŕen guięb xcuerp Jesucrist. Laagajcaman caguiil xcasti. ³⁰Din guial rüjn ree bejn zian zeel dád ziendi ragxuu, zien t́eedi ad yu't gojl abi' zien reeman ma güjt. ³¹Per bal yalojxgaj yaguieen ree xgab xhienaag nabajn ree loj Dios dxel ma zajc yadaaw ree xche guin, achetri xcasti Dios yayal ree. ³²Per ziangajc bal yu' xcasti Dios ni yayal ree, laan naj par guzuxnejzaman dunuj ree chitęę yaguieen ree dol, chitęę yayal ree casti ni rayal ree b́en ad rliladxt xtiidxaman.

³³Zeel compniar raliduladx ree Jesucrist, chi radxaag lasa'di par gawidi, gol gulęz ree xcompniaridi din gawidi tijbzi. ³⁴Per bal yu'di ad zajc cwęz guial ma rliaandi, zagdxeli gaw lidxidi chitęę yayalidi xcasti Dios guial ad züjntidi zi'c rayal. Gra ni rayal ganin lojdi, chi guialan guidganan lęjt dxel yanee ree.

Quiargueijn ni runee xSprijt Dios

12 Yan ganin lęjt, quiargueijn ni runee Dios loj tijb gaj bejn por xyudar xSprijt Dios, din ad ŕentan guibandi sin guial gagbeedi ni guin ree.

²Lęjt ragbee guial chi gadidi güünbee Dios dxel gogdxadi, bidxga'di ni na ree bejn lojdi naj ree dios abi'za ni'quid rnieet reen. ³Zeel gol gogbee, chutęęz b́en rnieeguijdx Jesucrist, ŕen guięban guial ad nabannętaman xSprijt Dios. Achu t́eet bejn zajc guięb: "iJesucrist naj b́en rniabee naj!", bal id nabanman con xSprijt Dios.

⁴Quiargueijn rent quiargueijn ren runee Dios dunuj ree, per Sprijt guin gajc naj b́en ragnę dugra ree. ⁵Majsi ni rent ni ren naj xmandad Dios ni cayguieen ree, per laagajcaman naj b́en ni cayguieen ree sirv. ⁶Abi' majsi garent garen cayüjn tijbgaj bejn, Dios gajc naj b́en ni cayüjn yudar tiblojzi. ⁷Tijbgaj dunuj ree rulüü Dios ni rayal yaguieen ree con xyudar xSprijt Dios din yaguieen ree yudar dux compniar ree. ⁸Din con xyudar xSprijt Dios yu' ree b́en ma ca' quiargueijn par guiniee reeman, yu' t́eę ree b́en ma ca' quiargueijn par chignia' reeman diidxli xcwent Dios. ⁹Abi' por xyudar xSprijt Dios yu' ree b́en ma cwa' guialrliladx ni guidiblagaa. Yu' t́eę ree b́en ma cwa' guialrniabee par yayüjn reeman b́enragxuu ree. ¹⁰Yu' t́eę ree b́en ma cwa' guialrniabee par güün reeman gadxagayaa ree milagr. Yu' ree b́en ma ca' quiargueijn par gudęęd reeman

xtiidx Dios loj ree bejn. Yu' t́eē ree b́en ma cwa' ree quiarguiejn par gagbee reeman bal wali o ad walit ni canee b́en ŕeb guial caneeman xtiidx Dios. Yu' t́eē reeman ma ca' quiarguiejn par guinee reeman gadxagayaa ree diidx, abi' yu' reeman ma ca' quiarguiejn par yad́eēd reeman tijb diidx par stijb diidx. ¹¹Per por xyudar gajc xSprijt Dios ŕijn bejn ni guin ree, laaman ma ragbee conin rud́eēman ǵiūn tijb gaj bejn ni naladxaman naj zagdxe.

Tijbzi cuerp nayajc dugra ree

¹²Din zi'c dux cuerp ree majsi zien la' najn, per tijbzi nayajc ree. Ziangajc dunuj ree guial raliduladx ree Jesucrist majsi zien nayajc ree per tijbzi nayajc ree con laaman. ¹³Din dugra ree barobnijs por tijbzi xSprijt Dios par yayajc ree tijbzi con gra ree dux compniar ree majsi nayajc ree b́en Israel o ad nayajct ree b́en Israel, bal nayajc ree zi'c b́en nado' o ad nayajct ree zi'c b́en nado', per tijbzi ma nayajc ree din dugra ree tiblojzi nabajn ree con xSprijt Dios.

¹⁴Ĺejt ragbee guial ad tibia'tzi naj xcuerp bejn, zien la' naj xcuerp bejn. ¹⁵Yan bal guiēb guia' bejn: “Ad najtan tibia' xcuerp bejn din ad najtan yaa bejn.” Per ad por ziant ad najt guia' bejn tibia'man. ¹⁶Ziangajc majsi guiēb guidiajg bejn: “Ad najtan tibia' xcuerp bejn din ad najtan guiaalojman”, ad por ziant ad najtri guidiajgaman tibia' xcuerpaman. ¹⁷Din bal guidib xcuerp bejn najc guiaalojman, ħhieza naag

niguiejnman?, o bal guidib xcuerp bejn najc guidiajgaman, ħhieza naag niuxi'man? ¹⁸Per Dios ma ragbeeman banguin rayal guzoobaman tibia'gaj ni naj xcuerp bejn din gacaman zi'c ŕenman.

¹⁹Din bal najc xcuerp bejn tiblojzi, dxel ad najtran cuerp. ²⁰Per zi'c ma rnin ĺejt majsi zien la' naj xcuerp tijb bejn per tijbzi naj guidiban.

²¹Ad zajct guiēb guiaaloj bejn loj yaaman: “Ad ryaadxtan ĺij.” Ad zajct t́eēt guiēb guiyc bejn loj guia'man: “Ad ryaadxtan ĺejt.”

²²Din luar lod ruluū ad ŕijnza'ct sirv, laa reen naj ni mazri ŕijn sirv. ²³Abi' ree luar lod ad rguient zagdxe, raguieen ree naguiejn din guiguien reen zagdxe. Guíaad ree luar naguie'ch, mazri raya'p ree cudad luar guin ree rata'cw reen din guiguien reen zagdxe. ²⁴Ad zro't radxu' ree xgab por ree luar ni rguien, mazri raya'p ree cudad luar naguie'ch ree zeel radojt ree xhienin din guiguien zagdxe dux cuerp ree. Zianan been Dios xcuerp bejn ²⁵din chit́eē yaguieen ree xgab guial yu' lod ad ŕijnnt sirv, guidib dux cuerp ree ŕijn yudar lasa'. ²⁶Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

²⁷Yan ziangajc guial nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tibia' cuerp guin. ²⁸Abi' entr gra dux compniar ree b́en ŕiladx Jesucrist. Dios yaloj bacaabeeman b́en naj ree xi apóstoles Jesús, ni barojp bacaabeeman b́en

gudëed ree xtiidxaman loj ree bejn, bayon bacaabeeman b́en guliüü ree xtiidxaman bejn ree, dxel bacaabeeman b́en gap ree guialrniabee par yayüjn reeman b́enragxuu ree. Bacaabee tēeman b́en güün ree gadxagayaa milagr. Bacaabee tēeman b́en ni güün ree yudar bejn ree. Bacaabee tēeman b́en ni nabee ree loj ree b́en rililadx xtiidxaman abi' bacaabeeman b́en ni rniee ree zien ree diidx. ²⁹Ad grat ree bejn naj apóstoles ad gra tēet ree bejn zajc gudëed xtiidx Dios loj ree bejn, ad grat ree bejn zajc guliüü xtiidx Dios bejn ree. Ad grat ree bejn zajc güün milagr, ³⁰ad gra tēet ree bejn zajc yayüjn ree b́enragxuu, abi' ad grat bejn zajc guiniee zienloj diidx ad gra tēet bejn zajc yayüjn tijb diidx zatijb diidx. ³¹Per gol been naguiejn din gunee Dios lējt quiarguiejn zagdxee ree, abi' naj ganin lējt conin naj nejz mazri zagdxee chinalidi.

Xcwent guial rēn bejn ree

13 Din bal rajc rnien zienloj diidx ni rniee b́enguidxliuj nē xtiidx ree anjl yu' xanyabaa, per bal id rēnan bejn najzan zi'c tijb guiib rzijdx o zi'c tijb plati ni yu' cha'. ²O bal nayalan nudēdan xtiidx Dios loj ree bejn, o nia'pan quiarguiejn par niagbeen gra ni zēed por Dios ni gad gagbee bejn, o nia'pan zienloj guialrignia' o nia'pan tijb guialrliladx Dios ni xt zile' guchan xliajt ree guia', per bal id rēnan bejn ree achet lasajcan. ³Ziangajc majsi gagui'san gra ni ra'pan loj ree b́en ni ryaadx laan abi' yayü da cuerpan din che'can,

per bal id rēnan bejn ree achet lasajc ni cayünan.

⁴Guial rēn lasa' naj gap pacens lasa' bejn, gac bejn benza'c con lasa'man, ad zadēdlojt lasa' bejn, ad züjnt bejn nabē, ad züjnt bejn benro' loj lasa'man. ⁵Guial rēn lasa' naj gap respejt lasa' bejn, ad gac bejn naxhien, ad yalenya'man, ad chu'xyajñ tēē lasa' bejn, ⁶ad rayalt yabaa bejn por ni mal ni cayüjn bejn o ni cazajcaman, rayal yabaaman chi zē bejn xnejz. ⁷Guial rēn lasa' naj güün bejn perdon lasa'man ni güünnētzí reeman laaman, abi' chililadx lasa'man, ad zadxag tēētaman cwēzaman ni cabēzaman, taan tēeman ni rüjnnētzí reeman laaman. ⁸Guial rēn lasa' ad yu't dxej loxan, per guialrajc yu' dxej loxan, ad zu tēetri b́en ni rudëed ree xtiidx Dios loj ree bejn ni'qui ree b́en rniee zienloj diidx. ⁹Din yan bal rayignia' ree, tibda'nzi naj ni rayignia' ree abi' bal radëed ree xtiidx Dios loj ree bejn, tibda'nzi rayagbee ree xcwentaman. ¹⁰Per chi guidxin dxej yayignia' ree gran, dxel achetri lasajc ni rayagbee ree yan.

¹¹Chi gocan xindoo gunen zi'c xindoo, benan xgab zi'c xindoo, go'pan xquiarguiejn xindoo. Per chi bidxin dxej gojcan bengol basa'nan gra guial xindoo tiblād. ¹²Ziangajc yan ad rayignia't ree gra zi'cgajc chi ad rguient zagdxee loj tijb guiaawajñ, per chi guidxin dxej yadxin ree lod zojb Dios dxel yayignia' ree gra. Yan yu'zi ni rignia'n per chi guidxin dxej guidxinan lod zojb Dios dxel günbeen gra zi'c nünbeeman naj.

¹³Choon naj ree ni ad yu't dxej lox, guialrliladx Dios, guialrbēz ni

gunee Dios, në guial rën Dios dunuj ree. Per loj guiyon ree ni guin mazri lasajc guial rën Dios dunuj ree.

Guialrniee stijb diidx

14 Gol been naguiejn gol guyën ree bejn, gol gurejdx gunab tëë Dios din guneeman xquiarguiejndi din güüнди xmandadaman, per mazri rüjn naguiejn gapidi quiarguiejn par gudëëdi xtiidx Dios loj ree bejn. ²Bën rniee tijb diidx ni ad rignia't gra bejn, güünman cwent guial achut caneenëman. Tijbzi Dios caneenëman guial achut rignia' xtiidxaman, tijbzi laaman ragbee ni caneeman per bejn ree ad ragbeet reeman ni rën guiëb ni caneeman. ³Per tijb bën rulüü xtiidx Dios bejn ree cayüjnman yudar xhienaag chinal bejn xtiidx Dios, cudëëdaman consejw loj ree bejn ragu' tëëman luxdoo reeman. ⁴Abi' bën rniee tijb diidx ni ad rignia't gra ree bejn, par tijbzi laaman naj ni caneeman, per bën rniee xtiidx Dios cayüjnman yudar gra ree xbejn Dios din gusnuu chinal reeman xnejzaman.

⁵Bal zianclaa gradi niajc niniee zienloj ree diidx, per mejorlan bal zajc gulüüdi bejn ree xtiidx Dios. Din mazri lasajc guial guiniee bejn xtiidx Dios guial loj guial guinieeman zienloj ree diidx, o bajtëë bal zile' guiëbaman loj ree bejn xhie rën guiëb ni rnieeman din güün sirv ni rnieeman gra ree bejn. ⁶Din zi'c naj bal guitixlon lëjt compniar raliduladx ree Jesucrist, abi' ganen lojdi tijb diidx ni ad

zignia'tidi, ÷xhieza sirv güünan lëjt bal id canin lojdi zagdx ni balüü Dios naj o ni ragbeen o bal id canen xtiidx Dios lojdi zagdx o xhietëëz zatijb ni rayal gusiididi?

⁷Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdx ad zignia't ree bejn xhienin cucwejdxaman.

⁸Ziangajc bal id zucwejdx reeman zagdx trompejt loj wadijl, ÷xhieza naag chignia' reeman guial ma rayal suchaaw reeman par til reeman con ree bën rayal tilnë reeman? ⁹Yan ziangajc bal guinieenëdi bejn ree con tijb diidx ni ad rignia't reeman, ixhieza naag chignia' reeman ni rëbidi! Xlia'zi caneedi achut rignia' ni rnieedi.

¹⁰Lëjt ragbee guial zienloj diidx yu' loj guidxliuj guie, per graczan yu' ni rëban par bën rignia' laan. ¹¹Per bal chu guinieenë naj con tijb diidx ni ad rignia'tan dxel benzit najman par naj abi' za naj benzit najn par laaman. ¹²Zeel zi'c rëndi gapidi quiarguiejn por xyudar xSprijt Dios par güüнди xhietëëz ni naj xchiin Dios, gol gunab loj Dios din yazaladxaman quiarguiejn lojdi din gac güüнди ni rüjn sirv par gra ree xbejn Cristo.

¹³Zeel bën ni rniee tijb diidx ni ad rignia't gra ree bejn, rayal guiniabaman loj Dios din gagnëman laaman din gac gusignia'man bejn ree ni rëbaman. ¹⁴Din zi'c naj bal gabledx ganaaban Dios con tijb diidx ni ad rignia'tan dxel tijbzi da sprijtan ragbee ni canen, per naj ni'quid ragbeetan xhienin canen. ¹⁵Zeel ni rayal günan naj, gabledx ganaaban loj Dios con da sprijtan

abi' gagbeen xhie rën guiëb ni canen. Ziangajc chi rolan cant ree par Dios rayal gagbeen chignia' tēen xhie rën guiëb ni cayolan. ¹⁶Din bal rnieel diidx zagdx ree loj Dios con diidx ni ad rignia't ni'qui lüj. Dxel bèn za' con lüj, ad zajc guiëbaman “Amén” chi ma gulox badëedil quixtëe loj Dios guial ad rignia'taman ni rnieel. ¹⁷Majsi nix da't badëedil quixtëe loj Dios, per achetczy yudar beenl bèn za' con lüj par gagbeeman xhienaag chinalaman xnejz Dios guial ad bignia'taman ni rëbil. ¹⁸Quixtëe Dios naj mazri rajc zien loj diidx guial loj gradi. ¹⁹Per majsi zian chi za'n lod rado'p ree dux compniar ree bèn riladx ree Jesucrist par ganenë'n laa reeman, par naj mejorli naj ganenë'n laa reeman con gaay diidx per diidx ni chignia' reeman nē ni güün laa reeman sirv din gulüü reeman ben ren ree luar ganenë'n laa reeman con chiimil diidx ni ad rignia't reeman.

²⁰Compniar raliduladx ree Jesucrist, ad bal rüjnridi xgab zi'c xindobëz. Gol gojc zi'c xindobëz per guial ad züjntidi ni mal, per par güündi xgab gol been xgab zi'c bengol. ²¹Loj xtiidx Dios rëb: “Gaxhalan bèn rniee ree diidx ren, bèn ad najt ree bèn niz guie din guinieenë reeman bèn guie ree. Per ni'qui zian ad zuzoobt reeman da diidxan, rëb dux Dad ree Dios.” ²²Zeel guial rniee zienloj diidx, najn tijb sen par ree bèn ad riladxt xtiidx Dios din chililadx reeman. Per guial rulüü bejn ree ni rën Dios gagbee reeman, laan naj ni güün sirv par ree bèn ma

riladx ad par bèn ad riladxt. ²³Per ni'qui zian chi radxaag lasa'di par gucaagdiajguidi xtiidx Dios, abi' bal suloj guinee tijb gajdi gadxagayaa diidx ni achut rignia' abi' chu' ree bèn qui bililadxri xtiidx Dios o bèn ad waliladxt ree xtiidxaman, çwen id zanaladx reeman ya guial guijquidi rajc? ²⁴Per bal chu' bèn qui bililadxri o bèn ad waliladxt abi' caneedi xtiidx Dios, dxel chi guiguiejnman ni caneedi, gagbeeman xhie dol cayüjn reeman, laagajcaman gagbee chu najman. ²⁵Zian gagbeeman xhienaag nabanman dxel guzuxibaman cwedx guiniabaman Dios, abi' guiëbaman guial diidxli za' Dios con lëjt.

Gol been gra xnejz

²⁶Gra ni canin lojdi compniar raliduladx ree Jesucrist, caninan din gagbeedi guial chi rado'pidi par gucaagdiajguidi xtiidx Dios, gradi zajc güün ni chile' güündi, bèn ni gool cant par Dios, bèn ni gulüü ree bejn, bèn gugojn bejn ree conin balüü Dios lojman, bèn guinee diidx ren ni ad rignia't gra bejn nē bèn gudëed xtiidxaman loj ree bejn. Per gra ni güündi güün sirv par güünan yudar los demazri ree xcompniaridi din gusnuu sudxi'ch reeman loj ni riladx reeman xtiidx Dios. ²⁷Bal yu' bèn rniee tijb diidx ni ad rnieet gra bejn, tio'pzaman o choonzaman guinee diidx ni rajcaman, abi' tijb gaj tijb gaj reeman guinee, chu' tēe bèn ni guiëb loj ree bejn xhie rën guiëb ni rëb reeman. ²⁸Per bal id yu' bèn zajc gugojn bejn ree xhienin rëb

reeman con diidx ni rajc reeman, mejorli achet guiéb reeman delant loj ree bejn. Zagdxeli laazi reeman cwedx Dios lén luxdoo reeman.

²⁹Abi' ree b́en gugojn delant loj gra ree bejn conin balüü Dios laa reeman, tio'pzi reeman o choon reeman guinee. Abi' los demazri reeman gucaagdiajg bal zagdxequi naj ni canee reeman. ³⁰Per bal tijb b́en zojb cucaagdiajg loj hor guin gülüü Dios laaman xhienin, rayal yacwëéz b́en canee din gac gugojn b́en guin bejn ree xhie nin balüü Dios lojman loj hor guin. ³¹Gra ree b́en ni bayal gudëéd xtiidx Dios loj ree bejn, gradi zajc gugojn bejn ree xhienin balüü Dios lëjt, per tijb gajdi chi yayalidi din gra ree b́en cucaagdiajg gusiid reeman chu' tää luxdoo reeman. ³²Gol badxe'guijc guial ree b́en rudëë xtiidx Dios loj ree bejn laagajc reeman rniabee laa reeman din guinee reeman chi rayal guinee reeman. ³³Din Dios ad rëntaman tijb ni ad najt xnejz, rënman tijb ni naj xnejz din yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo, ³⁴loj hor ni ma cucaagdiajg reeman xtiidx Dios ad yu't permis guinee ree b́engunaa rayal guzoob reeman xtiidx xixinguiaw reeman zi'c rëb Dios güün reeman diizd gulal. ³⁵Bal xhie rën reeman gagbee reeman, mejorli lidx reeman guiniabdiidx loj lacheel reeman, din natun guinee tijb b́engunaa loj hor ni cucaagdiajg reeman xtiidx Dios.

³⁶Gol basaaladx guial ad lëjtit naj b́en yaloj cwa' xtiidx Dios ad

tijb täätzi lëjt ragbee xtiidx Dios din güüendi zi'c naj xixgabidi. ³⁷Bal chu b́en naladx guial ma cwa'man quiarguejn par gudëëman xtiidx Dios loj ree bejn o por xSprijt Dios ma cwa'man xhie stijb quiarguejn, dxel laa gagbee gajcaman guial ni cucan loj gui'ch guie najn zi'c rniabee dux Dad ree Dios. ³⁸Per bal id rriladxaman ni canin lojdi loj gui'ch guie, ziangajc ad chililadxidi xtiidxaman.

³⁹Yan zi'c ma rnin lojdi compniar raliduladx ree Jesucrist, gol been naguejn din gapidi quiarguejn din gudëëdi xtiidxaman loj ree bejn, ad bal gudxoondi guinee tijb ree xcompniaridi b́en rniee tijb diidx ni ad rignia'tidi. ⁴⁰Per gra ni rüjndi gol beenan xnejz, gol beenan zi'c rayal.

Baban Jesucrist loj ree bengüt

15 Compniar raliduladx ree Jesucrist, rën tää gusaaladxidi xtiidxza'c Jesucrist ni ma rnin lojd, diidxza'c ni ma bililadxidi loj ni za'dxi'chidi. ²Gol basaaladx guial por ree diidxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

³Yalojxgaj balün lëjt ni basidan yaloj. Rnin lojdi guial Cristo güt por dux tol ree zi'c rëb loj xtiidx Dios. ⁴Abi' biguie'chaman dxel ni goc choon dxej babanman zi'cgajc rëb loj xtiidx Dios. ⁵Chi ma babanman, dxel balüülojman loj Bëd dxel loj los demazri ree apóstoles. ⁶Zianz balüülojman në loj ree tijb cwa ree b́en rriladx laaman, gojc reeman mazri de gaay gayuu bejn.

Yu' reeman ma güjt, per mazri zien reeman sta naban. ⁷Balüü loj tēēman loj Santiaaw dxelri loj ree apóstoles. ⁸Ni bigra balüülojman lon, naj najn zi'c tijb xindo ni rajl chi ma gudēd tiamp ni rayal galix. ⁹Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin bèn rililadx ree Jesucrist. ¹⁰Per guial naj Dios benza'c zeel najn ni najn, abi' ad bayaxlia'tzaman naj din naj mazri ma benan xmandadaman guial loj los demazri ree xbejn Jesús, majsi diidxiczi ad da xtijbt naj cayünan ni cayünan, nē con xyudar Dios cayünan laan. ¹¹Zeel achet güünan bal por chunin biguejndi xtiidx Dios bal por naj o por stijb ree xbejn Jesús, ni mazri lasajc naj guial ma biguejndan abi' ma bililadxidan.

Yaban ree bengüt

¹²Yan zi'c ma balüün lējt xtiidx Dios guial baban Cristo, ¿chexquiza zeel yu'di rēb ad zabant ree bengüt? ¹³Bal id zaban ree bengüt, rēn guiēban guial ad babant Cristo. ¹⁴Abi' bal id baban Cristo dxel achet sirv ni caylüün lējt, ache tēēt sirv ni rililaxidi laaman. ¹⁵Dxel bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxel ad walitan guial baban Jesucrist. ¹⁶Din bal id zaban ree bengüt, dxel ni'qui Jesucrist ad babantri. ¹⁷Abi' bal id babanman, achet sirv guial rililaxidi laaman ache tēēt perdon yu' por xtolidi. ¹⁸Bal naj zian, xt ree bèn ma güjt achet xperdon

reeman majsi bililadx reeman Jesucrist. ¹⁹Bal lojzi guidxliuj guie güün sirv ni baliladx ree Jesucrist dxel dunujzi ree nayajc ree bèn naban mazri naya guial loj chutēēz bēnan.

²⁰Per diidxiczi Jesucrist naj bèn baban, abi' laaman naj quijb bèn yalaj baban. ²¹Abi' zi'c bidoonloj guialgüjt loj guidxliuj guie por tijb bejn, ziangajc por tijb bejn yaban ree bengüt. ²²Zi'c bidoonloj guialgüjt par gra ree bejn por Adán, ziangajc yan por Jesucrist ma yu' stijb guialnaban par ree bèn rililadx laaman. ²³Per gra gac zi'c rayal: Yalaj Jesucrist naj bèn baban, dxel chi gui'taman stijb dxel ma yaban ree bengüt bèn bililadx ree laaman. ²⁴Abi' chi ma beenman gan gunabeeman gra ree bèn rdxe'ch laaman, zi'c ree bèn rajp guialguxtis nē ree bèn rajp graloj guial rniabee, dxel ma yayü xguialrniabeeman loj dux Dad ree Dios. ²⁵Din rayal nabee Cristo xt chi ma beeman gan canabeeman gra ree bèn rdxe'ch laaman. ²⁶Abi' ni chigra gunidlojman naj guialgüjt. ²⁷Loj xtiidx Dios rēb guial Dios badēē guialrniabee loj Jesucrist din nabeeman gra, per ad rēnt guiēban guial nē Dios rniabeeman din Dios badēēd guialrniabee lojman. ²⁸Abi' dxej ni ma rniabee Jesucrist loj gra dxel yayüman guialrniabee ni badēēd Dios lojman din ma nabee tijbzi Dios gra.

²⁹Yan bal id zaban ree bengüt, ¿chexquiza zeel yu' ree bèn rirobnijs xcwent ree bèn ma güjt, abi'za bal id zaban ree bengüt?

³⁰Achet sirv guial nadxu'n loj ni nadxeb gra hor. ³¹Din rugojnan lējt,

gra dxej za'n loj guialgüjt, laan naj ni diidxli ni rnin lëjt zi'cgajc walin guial dad nix yu' luxdon con lëjt guial najdi xbejn Cristo. ³²Yan bal naabzi loj guidxliuj guie güün sirv ni cayünan dxel achet sirv ni basajc ree b́en Éfeso naj, naj reeman bendoxh zi'c ree bedoxh. Din bal id zaban ree bengüt mejorli yaguieen ree zi'c rëb ree b́en rëb: “Yadaaw ree yadü' tēë ree din guixie ma bayëjt ree.”

³³Per naj rni lëjt ad tiëbidi gusquiee reeman lëjt. Din guial ridxga' xtiidx ree b́en ni ad zët xnejz, najzan par guxhiinan zi'c nabandi. ³⁴Zeel gol been xgab zi'c rayal ad bal rüjn tēëridi dol din yu'di ni'quid nünbeetidi Dios, zeel canin lojdi zian din yaya'nxtudi.

Xhienaag yaban ree bengüt

³⁵Per wed yu'di rüjn xgab: “¿Xhieza naag yaban ree bengüt? ¿Xhienaag naj cuerp ni gap reeman?” ³⁶Per xgab guin xgab tontzan. Din lëjt ragbee guial chi rxübin bejn tijb xhaj xhienin, chi rliejnan dxel rniyt xhaj ni guxübinman. ³⁷Ad cwaan ni rliejn guint rxübin bejn, xhajnan rxübinman, zi'c rüjn bejn con trigo o xhietëëz stijb xhaj nin. ³⁸Per chi rliejnan ma najn cwaandoo zi'c rniabee Dios gacan, xhietëëz xhaj nin ni rxübin bejn ma yu' cwaando ni guilianan. ³⁹Zi'c nadxaa xcuerp bejn con xcuerp ree be, nadxaa tēë bëjl con xcuerp ree biguijn. ⁴⁰Nadxaa tēë ree ni yu' xanyabaa con ree ni yu' guidxliuj, nadxaa naj guialza'cdxoon ree ni yu' xanyabaa con ree ni yu' loj guidxliuj.

⁴¹Nadxaa xbacha' gubijdx guial loj bëëw nadxaa tēë xbacha' ree bajl xanyabaa, xt ree bajl xanyabaa garent garen naj xbacha' reen.

⁴²Yan ziangajc gac con guial yaban ree bengüt. Cuerp ni rguie'ch rodخان, per cuerp ni gap bejn stijb ad yu't dxej godخان. ⁴³Cuerp ni rguie'ch rxinan, per chi yaban bejn stijb ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stijb ma gapaman cuerp ni yu' gojl. ⁴⁴Rguie'ch cuerp ni rajp bejn loj guidxliuj guie, per chi yaban bejn stijb ma gapaman tijb cuerp ni güün sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

⁴⁵Loj xtiidx Dios rëb guial yaloj Adán gojp guialnaban loj guidxliuj guie. Dxel bi't Jesucrist, b́en razaladx guialnaban loj ree bejn.

⁴⁶Ad yalojt rajp bejn guialnaban ni gapaman xanyabaa, yalojxgaj rajpaman guialnaban loj guidxliuj guie dxel guialnaban xanyabaa.

⁴⁷Adán gojcaman con yuj zeel najman bénguidxliuj, per Jesucrist xanyabaa zëëdaman. ⁴⁸Gra ree bénguidxliuj naj xcuerp reeman zi'c goc xcuerp Adán loj guidxliuj guie, per chi guidxin dxej dxel gap ree bejn tijb cuerp lasa' cuerp ni rajp Jesucrist xanyabaa. ⁴⁹Din zi'c nayajc ree zi'c goc Adán loj guidxliuj guie, ziangajc yayajc ree zi'c naj Jesucrist xanyabaa.

⁵⁰Abi' rugojnan lëjt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios.

Din ni rodx ad zajct chu'n lod yu' ni ad rodxt. ⁵¹Per ŕenan gagbeedi tijb ni achutctzi wayagbee xt yan guial ad dugrat ree yayéjt, per dugra ree guidxaa zi'c nayajc ree, yaya'p ree cuerp ren. ⁵²Laan gac chi yaguiejn ree trompejt ni gugojn dunuj ree guial ma bidxin tiamp ni yarii ree loj guidxliuj guie, dxel tibrajtzi zi'ctzi chi ruchip guiaaloj bejn zian guidxaa zi'c nayajc ree. Chi guibejdx trompejt guin yaban ree bengüüt dxel ad yu'tri dxej guiët reeman abi' hor zii ma bidxaa zi'c nayajc ree yan. ⁵³Din rüjn naguiejn guidxaa cuerp ni rodx por stijb cuerp ni ad yu't dxej godx guidxaa t́eë cuerp ni ŕejt por stijb cuerp ni ad yu't dxej guiët. ⁵⁴Abi' chi ma bidxaa cuerp ni rodx por stijb cuerp ni ad yu't dxej godx guidxaa t́eë cuerp ni ŕejt por stijb cuerp ni ad yu't dxej guiët, dxejzii naj dxej ni ma gojc cumplid ni ŕeb loj xtiidx Dios lod ŕeb: “Xt guin ma bayaaloj gojc gan loj guialgüjt.” ⁵⁵Nadxel t́eë ma gojc cumplid zi'c ŕeb loj xtiidx Dios lod ŕeb: “Guialgüjt, ¿conza guial rüjnl gan? ¿Conza guial rusagzil bejn?” ⁵⁶Guialrusagzi guialgüjt naj por dol, abi' por ley ragbee bejn guial dol guin naj ni rniabee laaman. ⁵⁷Per quixt́eë dux Dad ree Dios, b́en rüjn dunuj ree yudar par yaguieen ree gan por xguialgüjt Dad Jesucrist.

⁵⁸Zeel compniar raliduladx ree Jesucrist zi'c ŕenan ĺejt rnin lojdi, gol guzudxi'ch ad chu' t́eë luxdoodi tio'p. Guixie guixie gol been naguiejn güüнди mazri xmandad Dios, din ĺejt ragbee guial ad ni xlia'tzi gra ni cayüjndi par Dad Jesucrist.

Milia ni rdo'p par ree xbejn Dios

16 Yan por milia ni naj guto'pidi par güüнди yudar stijb ree dux compniar ree b́en raliduladx ree Jesucrist, gol been zi'c gunabeen güün ree b́en rlliladx ree Jesucrist niz Galacia. ²Gazob dumingw tijb gajdi gol gule'c cintabl zi'ctzi beendi gan ĺen toxman, din chi guialan ad rüjntri naguiejn guido'pidi milia guin. ³Abi' chi guialan, b́en ni gucaabeedi par gaxhalan laa reeman chigsa'n gon guin Jerusalén gaxhalan laa reeman con gui'ch ni guiëb chu naj reeman. ⁴Abi' bal guguian guial rüjn naguiejn gan dxel chinë'n laa reeman.

Xhienaag naj xixgab Pab

⁵Yaloj gadëedan niz Macedonia dxel guialan Corinto guidganan ĺejt. ⁶Wed xchej gazun con ĺejt. Wed guidib tiamp nayaag gazun con ĺejt, dxel güüнди naj yudar din gan lod naj gan. ⁷Ad ŕentan gadëedzi nejzan gaguixon ĺejt, ŕenan gaglaan con ĺejt bal guneë Dios permis. ⁸Per yan naj yaya'nan Éfeso xt lanij pentecostés, ⁹din guie merctzi yan catiëjb ree bejn cucaagdiajg reeman xtiidx Dios, abi' ruluü zien reeman chililadx laan, majsi zien gajc reeman rdxe'ch naj por zian.

¹⁰Chi gui't Timoteo, gol been naguiejn din suman zagdxé con ĺejt, din lasa'gajc xmandad Dios ni cayünan cayüjnman. ¹¹Zeel achu ĺejt guiniajgaa lojman, gol beenman yudar din gusnuu xnejzaman sin guial chu'man xgab, din gui'taman

guie lod cabḗezan laaman con los demazri ree dux compniar ree.

¹²Abi' Apolos, naj guza'c laaman liaadx din nidnēman laa reeman nitixloj reeman lējt, per ad guyēntaman ni'taman yan, per zi'tcaman guitixlojman lējt chi guneen laaman tiamp.

**Diidx bigra ni bacaa
Pab loj gui'ch guie**

¹³Gol guzujsin gol guzujdxi'ch tḗe loj ni riladxidi Jesucrist. Gol gudaan ni gui'tzi gol guzujdxi'ch tḗe. ¹⁴Gra ni güündi gol beenan guial rēndi bejn ree.

¹⁵Compniar raliduladx ree Jesucrist, lējt ragbee guial Estéfanos con xfamilaman laa reeman naj b́en yaloj bililadx Jesucrist niz Acaya, ragbee tḗedi xhienaag cayüjn reeman yudar dux compniar ree b́en riladx ree Jesucrist. Zeel rnin lojdi: ¹⁶Lasa' ree b́en guin gol bazoob xtiidx reeman con gra ree b́en cayüjn xmandad Dios nē ree b́en cayüjn yudar cayajc mandad guin.

¹⁷Dád nix guyu luxdon chi baguiaad Estéfanos guie, nē Fortunato nē Acaico. Din por laa reeman guza'can zi'cgajc chi za'n con gradi. ¹⁸Laa reeman bagu' luxdon niz guie zi'c ragu' reeman luxdoodi, abi' lasa' ree b́en guin gol gojp reeman respejt.

¹⁹Gra ree compniar riladx Jesucrist niz Asia guie rugajpdioz reeman lējt. Abi' Aquila con lacheelaman Priscila con gra ree xbejn Cristo b́en rado'p ree lidx reeman, rugajpdioz reeman lējt, nayajc ree xbejn Cristo. ²⁰Gra ree dux compniar ree b́en riladx ree Cristo rugajpdioz reeman lējt, gol bagajpdioz tḗe lasa'di zi'c rayal.

²¹Naj Pab, quijb naj cuca lējtr guie ree par gugajpdiozan lējt. ²²Bal yu' b́en ad rēnt dux Dad ree Jesucrist, laaman ma rayal xcasti Dios. ¡Dux Dad ree Jesucrist nayob gui'taman!

²³Abi' dux Dad ree Jesucrist güünle' gradi. ²⁴Zi'c nayajc ree xbejn Cristo tiblojzi rēnan gradi. Amén.